

Siunnersuummut nassuiaatit

Nassuiaatit nalinginnaasut

1. Aallaqqaasiut

Tusagassiorfinnut tapiissuteqartarneq pillugu Inatsisartut inatsisaata nr. 20, 28. november 2016-imeersup allanngortinneqarnera pillugu Inatsisartut inatsisaata nr. 14, 21. november 2022-meersup akuerineqarneratigut suliniutinut tapiissuteqartarnermut aaqqissuussinerup siunertaq malillugu atorneqarsinnaasimannginnera nassuerutigalugu taamanikkut suliniutinut tapiissutaasartut pillugit malittarisassarineqartut Inatsisartut UKA 2022-mi atorunnaarsippaat. Tamanna ilaatigut nalilersuisartunit avataaneersunit tapersersorneqarpoq, taannalu nalunaarusiatut Inatsisartunut 2019-imi agguanneqarpoq.

Taamaalilluni tusagassiorfinnut tapiissuteqartarneq marlunnut avinneqarsimasoq atuuttoq atorunnaarsinneqarpoq. Taamanikkut Kultureqarnermut, Ilinniartitaanermut Ilisimatusarnermut Ilageeqarnermullu Ataatsimiititaliaq tassunga atatillugu allappoq tusagassiorfiit kiffaanngissuseqartut killilersugaanngitsumillu tusagassiisarnerup tapersersorneqarnissaat aamma tusagassiorfiit nutaarsiassalerisarnerisa pitsaassusaat arlaannaannullu atassuteqannginnerata qulakkeerneqarnissaa pingaaruteqartoq, tassa tusagassiorfiit arlaannaannulluunniit atassuteqanngitsut kikkut tamat oqartussaaqataanerini tunngaviulluinnarmata. Kiisalu tusagassiorfiit illugiilluni oqaloqatigiinnermik aamma oqaloqatigiinnermik pilersitsinerisa pingaaruteqarnerat uparuarneqarpoq. Illugiilluni oqaloqatigiinneq innuttaasunik paasissutissiisoq taamaalillunilu tamat oqartussaaqataanerini nukittorsaasoq, tusagassiorfiillu eqqortumik pitsaassuseqarpata piginnaasaqarpatalu aatsaat tamanna pisinnaalluni. Tassunga peqatigitillugu taaneqarpoq tusagassiorfiit pitsaassusaannut massakkullu pisunut sammisaqarnerannut tunngatillugu allatut nalilersueqqissinnaanissaq isumaliutaasinnaasoq.

Ilanngullugu taamani Naalakkersuisuusut ulluni 4. aamma 5. september 2024 qulequtaq "Tusagassiorfiit tusagassiorfiillu ineriartorneri 2024-2034" sammisaralugu Kalaallit Nunaanni tusagassiorfinnut aallartitat aqqutigalugit sammisallit qitiulluinnartut peqataatillugit tusagassiorfinnut isumasioqatigiissitsisimapput, ilaatigut unammilligassat pingaarnerit tusagassiorfiit naapittarsinnaasaat oqaluuseriniarlugit. Tusagassiorfiit inuiaqatigiinni suugaluartuni pingaaruteqartumik inissisimagaluartut ilaatigullu naalagaaffimmi pissaanerit sisamaattut isigineqartaraluartut ilaatigut qarasaasiakkut inuit naapittarfiini tatisimaneqarnermik misigisaqartarput, tamannalu annertusiartuinnartumik pisortanut immikkut attaveqarfissatut atorneqartarpoq, taamaalineranilu massakkut aningaasarsiornikkut pissusiviusumut, sulisussanik amigaateqarnermut tusagassiorfinnullu avataaneersunut isummertartussaallutik.

Oqallisiginninnermut siunissami patajaannerusumik ingerlatsinissaq qulakkeerniarlugu tunngavissat ilaatigut ilaapput, tassani aamma inatsisit tusagassiorfinnut tapiissutitut piumasaqaatinullu tassunga atatillugu atuutsinneqartut ilaatinneqarput. Tassani tusagassiorfinnut tapiissutit atuuffii pillugit apeqqut aamma ilaavoq, tassunga ilanngullugu tusagassiuutit "naqitaanissaat" pillugu piumasaqaat, tassani pappiaraanissaat aamma aaqqissuisuni sulisut amerlassusissaannut piumasaqaatit.

Apeqqutit eqqaaneqartut naalakkersuisooqatigiinnissaq pillugu isumaqatigiisummi aamma ilaatinneqarput, tassani tusagassiorfiit kiffaannngissuseqartut arlaannaannullu atassuteqanngitsut qulakkeerneqarnissaat siunertarlugu tusagassiorfinnut tapiissutit nutarterinissaq siunniunneqarpoq, taamaammallu tusagassiuutilerisut digitaliusut, assersuutigalugu nittartakkat podcastillu, tusagassiorfinnut tapiissuteqarnermi ilaasariaqarlutik. Peqatigisaanik nutarterinnermut ilaavoq pappiannngorlugu saqqummiussinissaq pillugu maannakkut piumasaqaat aamma tusagassiorfiup ikinnerpaamik ukioq naallugu aaqqissuisunik pingasunik peqarnissaa. Tusagassiorfinnut tapeeriaaseq ullutsinnut naleqquttooq, nutaaliornermut inissaqartitsisoq aamma tamat oqartussaaqataaneranni oqallinnermik nukittunerulersitsisoq naalakkersuisooqatigiit kissaatigaat. Tamatuma tusagassiuutit pappiaqqanik naqitanngorlugit saqqummiussinissaq pillugu piumasaqaat pillugu apeqqut pissutsitut tunngalerpoq aammattaaq aaqqissuisuni sulisut amerlassusissaat pillugu piumasaqaatip sakkukillinissaa pillugu isumaliuteqartitsilerluni. Podcastit pillugit apeqqummut naleqqiullugu pisariaqartitsineq naapertorlugu tusarnaarneqarsinnaasut nipillit videollu digitalinik imaqarneri piviusumik pineqarput. Podcastit radiukkut aallakaatitanut taamaattumik assersuunneqarsinnaapput imarisaanik qaqugu tusarnaarnissaq tusarnaartup nammineq aalajangersinnaanera allaassutaaginnarluni. Tamanna tunuliaqutaralugu taamatut ittunut tusagassiuutitut tapiissutit radio tv-lu pillugit inatsisikkut malittarisassiuunneqarpata tulluarnersasooq naliliisoqarpoq, tassa atortoq nipilik videolu piviusumik pineqarmat allatatut tusagassiuutaanatik.

2. Siunnersuummi immikkoortut pingaarnertit

a) Inatsisit atuuttut

Inatsit atuuttoq tassaavoq Tusagassiorfinnut tapiissuteqartarneq pillugu Inatsisartut inatsisaat nr. 20, 28. november 2016-meersoq Inatsisartut inatsisaatigut nr. 14, 21. november 2022-meersukkut allannngortinneqartoq, takuuk Tusagassiorfinnut tapiissuteqartarneq pillugu Inatsisartut inatsisaat nr. 63, 24 september 2025-meersoq pillugu inatsimmik nalunaarut. Inatsisartut inatsisaanni siunertaavoq tamat oqartussaaqataanerisa aamma tamat oqallinnissaasa periarfissaqarnerulernissaat siunertarlugu nutaarsiassat inuiaqatigiinnut piorsarsimassutsimullu pingaarteqartut tamatigoortuullutik amerlallutillu neqeroorutaanissaasa pingaarnertigut qulakkeeriniffiginissaa siuarsarnissaallu.

Inatsisartut inatsisaat tamatuma saniatigut ingerlatsinnermut tapiissuteqarnikkut tunisassiornermut tapiissutit pillugit tusagassiorfinnut tapiissuteqartarnermik atuuttumik

ingerlatitseqqinnermik annertuutigit tunngaveqarpoq. Tassunga atatillugu inatsisitigit malittarisassaliorneq pineqarpoq, inatsisartuni tunngaveqartumik tusagassiorfinnut tapiissuteqarnermi malittarisassat qulakkeerneqarnissaat siunertaralugu 2016-imi atulersinneqartoq, tassungalu inatsisartuni tapersersuisoqarpat malittarisassat taamaallaat allanngortinneqarsinnaallutik.

Inatsisartut inatsisaanni § 1, imm. 1-imi aalajangersarneqarpoq inuiaqatigiinnut paasissutissanik ingerlatitseqqinnermik, inuinnaat naalakkersueqataaneranni oqallinnermik tusagassiornermilu tamatiguussusermik siuarsaanermik siunertaqartunut nuna tamakkerlugu, naqitanngorlugit tusagassiorfinnut ukiumoortumik ingerlatsinermut tapiissutitut, aningaasanut inatsimmi aningaasaliissutit aalajangersimasut iluini qinnuteqartoqareerneratigit tusagassiuutinut tapiissuteqartoqarsinnaasoq. "Naqitani" paasineqassaaq saqqummiussinerit pappilianngorlugit saqqummersinneqartut imaluunniit amerlasuunngortinneqartut.

Ingerlatsinermut tapiissutit qanoq paasisariaqarnersut inatsimmi § 1, imm. 2-mi nassuiarneqarput. Tamanna pillugu aalajangersarneqarpoq ingerlatsinermut tapiissutit imatut paasineqassasut ingerlaavartumik ingerlatsinermi aningaasartuutitut, tassunga ilanngullugit sulisunut ininullu aningaasartuutitut, matusissutissatut tapiissutit.

§ 2-mi apeqqummi pineqarpoq tusagassiuutit suut tusagassiorfinnut tapiissutisisinnaasut aamma imm. 2 aamma 3-mi nassuiarneqarluni tusagassiorfik namminersortoq qanoq paasineqassanersoq. Tusagassiuutit naqitat qanoq paasineqassanersut aalajangersakkami nr. 4-mi nassuiarneqarpoq.

Kiisalu § 16-imi tapiissuteqarnissamut piumasaqaatit uku aalajangersarneqarput:

”§ 16. Tapiiffigineqassagaanni piumasaqaataapput:

- 1) tusagassiorfik Kalaallit Nunaanni angerlarsimaffeqassaaq,
- 2) tusagassiorfik piffissami tapiiffigineqarfimmi tamarmi akisussaasumik aaqqissuisoqassaaq,
- 3) ukiumi qinnuteqarfiusumi ukiorluunniit qinnuteqarfik sioqqullugu qinnuteqartup suliffeqarfik aallartissimanngippagu tusagassiorfik akisussaalluni aaqqissuisoq peqatigalugu minnerpaamik ukioq tamaat suliffiusunik pingasunik, katillugit tiimeqartunik aaqqissuussisartunik sulisoqassaaq,
- 4) saqqummersitat politikikkut, inuiaqatigiinnik kulturimillu sammisaqarfiunerusunik tusagassiorlut namminneq suliarisaannik tusagassianik imaqaassapput, tassani takoqqusaarutit ilanngunnagit imarisaata ikinnerpaamik affai sammisaqarfiit assigiinngiaartut pillugit ilanngutassianik aamma nutaarsiassanik oqallisigineqartunik sammisaqarluni aaqqissuisuneersunik tusagassianik imaqaassapput,
- 5) inuussutissarsiortut sulianilluunniit suliarinnittartut, sulisut, sulisitsisut inuussutissarsiutilluunniit immikkoortuisa kattuffii, politikikkut partiit sulisoqarfinniluunniit assigiinngitsuni sulisut kisiisa saaffigiinnarnagit atuisunut assigiinngiaartunut saqqummersitat saaffiginittuussapput, aamma
- 6) saqqummersitat minnerpaamik kalaallisut allassimassapput.

- 7) tusagassiorfik minnerpaamik qaammammut ataasiarluni nuna tamakkerlugu naqitanngorluni saqqummertassasoq,
- 8) qinnuteqarnissamut piffissaliussatut aalajangersarneqartoq nallertinnagu ingerlatsinermut tapiiffigineqarnissamut qinnuteqaat Naalakkersuisunit tiguneqareersimassasoq, tak. § 17, imm. 1, aamma
- 9) kingusinnerpaamik tapiiffigineqarnissamik qinnuteqaateqartoqarnera peqatigitillugu qinnuteqartup naatsorsuutai kukkunerisuiusumit oqaaseqaateqarfigineqarnikut kingulliit uppersaatsissallu pisariaqartut Naalakkersuisut tigusiassagaat, tak. § 17, imm. 2 aamma 3. *Imm. 2. Tapiissuteqarnermi tapiissutinut atasunik piumasaqaateqartoqarsinnaavoq.*”

Inatsisartut inatsisaannut atuuttumut nassuiaatinit takuneqarsinnaavoq tusagassiorfik ukioq naallugu aqqissuisoq akisussaasoq ilanngullugu aqqissuisoqarfik ikinnerpaamik pingasunik sulisoqarnissaa pillugu § 16, nr. 3-mi piumasaqaammut pissutaasoq tusagassiorfiit tapiiffigineqartut naammattumik pitsaassuseqartumik inuiaqatigiinnit kissaatigineqartumik tusagassiorsinnaanerini ikorfartuisumik aqqissuisoqassasut. Aalajangersagaq taamaalilluni isumaliuutersuutit pitsaassuserlu tutsuiginartumillu tusagassiiarnissaq aallaavigalugu ilisimasalinnik tusagassiorfinnik ingerlataqartunut tapiissutit atorineqartarnissaannut kissateqarnermik tunngavilersorneqarpoq, taamaalilluni assersuutigalugu inuit ilanngussisartut, tassunga ilanngullugu inoqatigiit attaveqataat malittarisassanut ilaatinneqarnatik.

Ukioq naallugu aqqissuisoqarfimmi sulisut amerlassusii pillugit piumasaqaat tusagassiorfinnut aallarterlaanut atuutinngilaq, tassa taakku piumasaqaammut ilaatinneqanngimmata, tamannalu aalajangersakkap immikkoortuata naanerani takuneqarsinnaalluni. Tusagassiorfinnut tapiissutinik qinnuteqartoq ukiumi qinnuteqarfiusumi imaluunniit ukiup siuliani suliffeqarfimminik aallartisisimappat tusagassiorfiup pineqartup § 16, imm. 1, nr. 3 naammassisimassanngilaa. Taamaalilluni piumasaqaammik naammassinninnissaannut tusagassiorfiit nutaat piffissamik qulakkeerneqarlutik: Pisut naapertorlugit tamanna isumaqarsinnaavoq tusagassiorfiup aalajangersakkanik naammassinninnissaanut ukiut marlungajaat ingerlasinnaassasut.

Kiisalu Inatsisartut inatsisaanni atuuttumi § 17-imiilluni qinnuteqarneq pillugu malittarisassat, tassunga ilanngullugit piffissaliussat pillugit, qinnuteqaatit imarisaannut piumasaqaatit pillugit aamma aalajangersagaq, taanna naapertorlugu paasisutissanik attuumassuteqartunik ilassutissanik Naalakkersuisut piumasaqarsinnaallutik, tassunga ilanngullugu tapiissutisinissamut piumasaqaatinik naammassinninnermut uppersaatsit ilaneqarsinnaaneri.

Aalajangersakkamit inerniliisoqarsinnaavoq tusagassiorfinnut tapiissutinik tunniussinissaq pillugu aalajangiineq Naalakkersuisunit isumagineqartartoq, piviusumik tusagassiorfinnut tapiissutit inissisimaffianni naalakkersuisoqarfimmi. Tusagassiorfinnut tapiissutinik aqutsinissamut taamaalilluni immikkut allaffimmi oqartussanik pilersitsisoqarsimanngilaq, tamatumunnga pissutaavoq tusagassiorfinnut tapiissutinik tunniussineq pillugu aalajangiinerit

kinaassusersiunngitsunik tunngaveqarnissaat, misigissutsit tunngavigalugit nalilersuinerit ilaatinneqarnissaannut periarfissiisoqarnani.

Aammattaaq Inatsisartut inatsisaanni § 18, imm. 1-mi aalajangersarneqarluni ingerlatsinermut tapiissutitut aningaasaliissutit immikkoortitanut marlunnut agguarneqarsinnaasut, agguarneri aningaasanut inatsimmi aalajangersarneqarlutik. Immikkoortitani siullermiipput tusagassiuutitut minnerpaamik sapaatip akunneranut ataasiarlutik saqqummersartunut tapiissutit. Immikkoortitat aappaaniipput tusagassiuutitut sapaatip akunneranut ataasiarlutik akuttunerusumit minnerpaamilli qaammammut ataasiarlutik saqqummersartunut tapiissutit.

§ 18, imm. 2-mi aalajangersarneqarpoq ingerlatsinermut tapiissutit tusagassiuutit ataasiakkaat ukiumi tapiissuteqarfiusumi aningaasat agguagassat iluanni saqqummersitat tapiiffigineqarsinnaatitaasut amerlassusaannut tamarmiusunut sanilliullugu tapiissuteqarnissamut piumasaqaatinik eqqortitsilluni ukiumi tapiissuteqarfiusumi saqqummersitaasa amerlassusaat tunngavigalugu agguanneqartassasut.

§ 18, imm. 3-mi aalajangersarneqarpoq aningaasaliissutit tamarmiusut qinnuteqartuni minnerpaamik ataasiinnarluunniit tapiissuteqarnissamut piumasaqaatinik eqqortitsippat atugassanngortinneqartassasut.

b) Siunnersuutigineqartoq

Siunnersuut pingaarnertigut tassaavoq tusagassiorfinnut tapiissuteqartarneq pillugu piumasaqaat tusagassiorfinnut saqqummiussanut imaluunniit pappilianngorlugu saqqummiussisunut taamaallaat tapiissutaasarnera peerneqassasoq.

Tamanna ilaatigut pissutigalugu "naqitat" § 1, imm. 1-imit peerneqassaaq. Tamatuma kingunerisaanik tusagassiuutilerisut digitaliusut Inatsisartut inatsisaannut ilaalissapput. Taamatuttaaq nutaarsiassanik tusagassiorfiit pineqarneri erseqqissarniarlugu "tusagassiorfiit" "nutaarsiassanik tusagassiorfiit" allanngortinneqarput.

Tamatuma saniatigut ingerlatsinermut tapiissutit qanoq paasineqarnissaannut tunngatillugu nassuiaatitut aalajangersagaammat Inatsisartut inatsisaanni § 1, imm. 2 atuuttoq ingerlateqqinneqarpoq.

Aammattaaq nutaarsiassanik tusagassiorfinnik nassuiaatitut aalajangersagaq nutaaq § 1, imm. 3 ikkunneqarpoq. Aalajangersakkami Sulisitsisut tusarniaanermut akissutaat tunngavigalugu "allat" ilanngunneqarsimavoq, matumani nutaarsiassanik tusagassiorfiit tamarmik kalaallit atuartartuut periarfissat assigiinngitsut atorlugit siammarterisarnissaannut nalornissutaasup suujunnaarsinnissaa siunertarlugu. Aalajangersakkami oqaasertai takuneqarsinnaasutut tassaatinneqarput tusagassiorfiit pappiaqqanik naqitaannarnik saqqummersitsisartut tamanna tunngavigiinnarlugu tusagassiuutitut tapiissutit pinissaminnut killilerneqanngimmata.

Aammattaaq tusagassiorfinnut tapiissutit tusagassiorfinnut naqitanut killeqarunnaarnerisa kingunerisaanik imm. 4 nutaaq ilanngunneqarpoq. Taamaattumik radiukkut tv-kkullu aallakaatitsisarneq, tapiiffigineqartartut malittarisassanillu allanik malittarisassaqaartinneqartut tusagassiorfinnut tapiissutit ilaannginnerisa erseqqissarneqarnissaa pisariaqartutut nalilerneqarsimavoq. Tassunga atatillugu oqaatigineqassaaq KNR Radiukkut tv-kkullu aallakaatitsisarneq pillugu Inatsisartut Inatsisaannit nr. 7, 8. juni 2014-imeersumit malittarisassaqaartinneqarmat, aningaasanullu inatsimmi kontomi pingaarnermi 40.94.16-imi immikkut aningaasaliiffigineqartarmat. Taamaaqataani atuulluni najukkani radioqarfiit tv-qarfiillu, najukkani radioqarfinnut aamma tv-qarfinnut tapiissutit pillugit Namminersorlutik Oqartussat nalunaarutaat nr. 29, 13. december 2016-imeersumut ilaasut aamma aningaasanut inatsimmi kontomi pingaarnermi 40.94.15 Najukkani radioqarfinnut tv-qarfinnullu tapiissutit.

Tamatuma saniatigut "naqitat" aamma § 2, imm. 1-imiit peerneqarsimallutik.

Tamatuma saniatigut "oqallisaasunik tusagassiorfiit" § 2, imm. 1-imit peerneqarpoq, tamanna nutaarsiassanik tusagassiorfiit paasineqarsinnaammat. Taamaattumik "nutaarsiassanik tusagassiorfik" sumiluunniit attuumassuteqarfiani atorneqassasoq siunnersuutigineqarpoq, § 1, imm. 3-mi nutaarsiassaqaartitsiviit nassuiarnera aamma takuuk. Aammattaaq aalajangersakkami tassani "nunaniluunniit allani pisunik Kalaallit Nunaanni pissutsinut tunngassuteqartitsisartunut" peerneqarpoq. Oqaasertaa piumasaqaammut "imarisaannik Kalaallit Nunaanni atuartartunut aqqissuisartunut" allatut periarfissaannginnera, taamaallaalli aqqissuussinerit taama ittut qanoq isikkoqarsinnaaneritut assersuutaammat. Taamaattumik assersuut aalajangersakkamut nassuiaatinut nuunneqarpoq.

§ 2, imm. 2, nr. 2-mi "imaluunniit atuisunik nalunaarsuiffik" ilanngunneqarsimavoq, tusagassiuutilerisut digitaliusut assersuutigalugu nittartakkamik alakkaasunik atuisut amerlassusaannik nalunaarsuisarnissaat pillugu naatsorsuutigisaq aallaavigalugu aalajangersakkami aamma tusagassiuutilerisut digitaliusut ilaatinneqalerkata.

Aammattaaq tusagassiorfiit naqitat qanoq paasineqarnissaat pillugu § 2, imm. 4 peerneqarpoq:

Aamma § 16, imm. 1-imi nr.3-mi ukiunut pingasunut naammassisinnaasanik piumasaqaateqarneq aalajangiusimaneqarpoq Sermitsiaq.ag-p tusarniaanermut akissutaa tunuliaqutaralugu. Aalajangersagaq illuani pitsaassusilimmik, kinaassusersiunngitsumik suliarilluakkamillu nutaarsiassanik pimoorussisumik nutaarsiassaqaartitsinermut iluaqutaasinnaasut ingerlataqartut ilisimasallit pineqarnissaat pillugu piumasaqaatip aalajangiussimaneqarneranut takussutaasinnaavoq. Tusagassiorfinnut tapiissutit taamaalillutik suli tusagassiorfinnut tapiissutaasassapput, tassunga ilanngullugit tusagassiorfiit minnerpaamik aqqissuisoqarnikkut piginnaasaqartut, kinaassusersiunngitsumik piviusunillu tunngaveqartumik politikikkut, inuiaqatigiinnut attuumassuteqartunik kulturimillu sammisaqartunik suliaqarsinnaasut. Aalajangersagaq taamaalilluni isumaliuutersuutit

pitsaassuserlu tutsuiginartumillu tusagassiisarnissaq aallaavigalugu ilisimasalinnik tusagassiorfinnik ingerlataqartunut tapiissutit atorneqartarnissaannut kissaateqarnermik tunngavilersorneqarpoq, taamaalilluni assersuutigalugu inuit ilanngussisartut, tassunga ilanngullugu inoqatigiit attaveqataat malittarisassanut ilaatinneqarnatik. Tassunga atatillugu aaqqissuussisuni sulisut amerlassusissaannut piumasaqaammiit tusagassiorfiit aallarlerlaat suli ilaatinneqartannginnissaat tulluurtutut nalilerneqarpoq, naak malittarisassanut atuuttunut naleqqiullugu piumasaqaat annikillineqaraluartoq. Tusagassiorfinnut tapiissutisinissamut piukkunnaateqalernissamut nalinginnaasumik piumasaqaataasoq aaqqissuisoqarnikkut piginnaasaqalernissamut piffissap ingerlasinnaanera tassani isiginiarneqarpoq. Aappaatigullu piumasaqaat piviusumik tapiissutisartut killeqartinnerisut isigineqarsinnaalluni, tassa pimoorussinissaq ilisimasaqarnissamillu piumasaqaat atuuttoq pissutigalugu assersuutigalugu inuttut ataasiakkaatut, tassunga ilanngullugit ilanngussisartut, tusagassiorfinnut tapiissutisinissamut imaaliiallaannaq piukkunneqalersinnaanngimmata.

Tamatuma saniatigut tusagassiuutilerisut digitaliusut ilaatinneqarnissaannik kissaateqarnermut tunngasoq § 1, imm. 1-ip allanngortinnera pillugu allanneqarsimasut pissutigalugit "naqitanngorlugu" § 16, imm. 1, nr. 7-imit peerneqarpoq. Tassunga peqatigitillugu Sermitsiaq.ag-p tusarniaanermut akissutaa tunngavigalugu aalajangersakkamut ilanngussisoqarpoq, tassalu internetimik tunngaveqarluni tusagassiorfik pineqarsimatillugu tusagassiorfiup nittartagaa ulluinnaat tamakkiallugit nutarteriffigisarnissaa matumani pineqarpoq. Tassunga atatillugu matumani taamanikkut § 7, nr. 1-ip atuuttup ilaannakortumik eqquteqqinnissaa pineqarpoq, taannalu Tusagassiorfinnut tapiissuteqartarneq pillugu Inatsisartut inatsisaata allanngortinneqarnera pillugu Inatsisartut inatsisaatigut nr. 14. 20. november 2022-meersutigut atorunnaarsinneqarpoq.

Tusagassiorfinnut tapiissutit pillugit malittarisassat Naalakkersuisoqarfiup ataani ingerlatsinerit piviusorsiortumik killeqartunit suli aqunneqassapput, maannakkut taanna tassaalluni Ilinniartitaanermut, Kultureqarnermut, Timersornermut Ilageeqarnermullu Naalakkersuisoqarfik. Tassunga oqaatigineqassaaq malittarisassat ullumikkut eqqarsaatigisassat piviusorsiunngitsut ilanngunneqarsinnaanerisa aarlerinartuusoq naliliisoqanngimmat. Allannguutissatut siunnersuutigineqartut taamaattumik tusagassiorfinnut tapiissutinik aqutsisussamik allaffeqarfimmik nutaamik pilersitsinissamik pisariaqartitsilinngillat, sulilu naatsorsuutigineqarluni missiliuinerimik tunngaveqartumik pisinnaatitaanerit ilanngunnagit paasisat, kinaassusersiunngitsut tunngavigalugit aqutsisoqarsinnaasoq.

Kiisalu siunnersuut ullormi 1. januar 2027 atuutilissasoq siunnersuummi § 2-mi aalajangersarneqarpoq.

3. Pisortanut aningaasaqarnikkut allaffissornikkullu sunniutissat

Aningaasanut inatsimmi kontumi pingaarnermi, 40.94.29 Kalaallit Nunaanni tusagassiorfinnut naqitanut ingerlatsinerimut tapiissutit, (Tapiissutitut aningaasaliissutit)

ingerlatsinermut tapiissutitut aningaasaliissutit immikkoortinneqarsimapput. 2026-mut aningaasanut inatsimmi aningaasaliissutit 1.842.000 kr.-iupput.

Inatsisartut tassaammata tusagassiorfinnut tapiissutit annertussusissaannik aningaasanut inatsimmi aalajangiisartut siunnersuut namminermi pisortanut aningaasaqarnikkut imaluunniit allaffissornikkut kinguneqartitsissanngilaq.

4. Inuussutissarsiutinik ingerlataqartunut aningaasatigut allaffissornikkullu sunniutissat

Siunnersuut namminermi inuussutissarsiortunut aningaasartuuteqarnermik kinguneqassanngilaq, tassa tusagassiornermik ingerlataqartut tapiissutisinissamut isigineqarsinnaanermut tapiissutisinissamut piumasaqaatinik naammassinnissinnaasut tusagassiorfinnut tapiissutini tunngavigineqarmata. Taamaattoq tusagassiorfinnut tapiissutininik tunineqarsinnaasutut ilaalernissamut periarfissaq tunngaviatigut annertusineqartoq naliliisoqarpoq. Tusagassiorfik pappiaranngorlugu saqqummiunneqarsinnaanngitsoq taamaalilluni tamanna tunngavigalugu tusagassiorfinnut tapiissutisinissamut ilaanngitsoortinneqarsinnaanngilaq.

Siunnersuummi nr. 3-mi § 16, imm. 1, nr. 7-imut tunngasortaani tusagassiorfinnut internetimik tunngavilinnut tunngatillugu ulluinnarni nutarterisarnissamut piumasaqaat tapiissuteqarfigineqarsinnaasunut apeqqummut tunngatillugu allannguutinik immini malitseqartussaannngitsutut nalilerneqarpoq, tassami tapiissutininik tiguisusaaq aaqqissuisoqarfimmi ukiumut suliffiusussat amerlassusissaat pillugit piumasaqaatinik naammassinnittuartaavaq.

Naliliisoqarporli ullumikkut suliassaqaarfimmi pingaaruteqartutut ingerlataqartoq soorlu Sermitsiaq.AG siunnersuutip malitsigisaanik tapiissutisiamigut annikillisaaffigineqassanngitsoq. Tunngavigisat pigineqartut tunngavigalugit tassunga atatillugu tusagassiorfinnut tapiissutisinissamut isigineqarsinnaasut tusagassiorfiit ingerlataqartut amerlassusaat aalajangerneqarsinnaanngilaq, tamannalu inuiaqatigiinni tusagassiuutitigut nalinginnaasumik isumalluutit killeqarnerinut atatillugu isigineqassalluni. Peqatigisaanik Sermitsiaq.AG naqiterinermut il.il. tunisassiornermut aningaasartuutimini sipaarsinnaassaaq.

5. Avatangiisinut, pinngortitamut inuillu peqqissuunissaannut sunniutissat

Tusagassiorfinnut tapiissutit tusagassiorfiup pappialanngorlugu saqqummersinnissaanut piumasaqaataajunnaarnera pillugu siunnersuut avatangiisit pinngortitarlu eqqarsaatigalugit iluaqutaasussatut nalilerneqarpoq. Tamatuma saniatigut siunnersuut avatangiisinut, pinngortitamut imaluunniit inuit peqqissuunissaannut sunniuteqartussatut kinguneqarnissaa naatsorsuutigineqanngilaq.

6. Inuit pisinnaatitaaffii aamma innuttaasunut kinguneqaatissat

Siunnersuut inuit pisinnaatitaanerannut Tunngaviusumik inatsisikkut illersugaasut, Den Europæiske Menneskerettighedskonvention (EMKR) imaluunniit nunat tamat akornanni isumaqatigiissutikkut qularnaagaasut kalluarneqanngitsuunngillat. Tusagassiorfik pappiaranngortillugit saqqummiisarunnaarpat aamma naatsorsuutigineqalersarpoq EMRK-mi artikkili 10. malillugu tamalaanik tusagassiutinik assigiinngiaarnerusunik ilanngussaqaarnerulissasoq. Siunnersuut innuttaasunut toqqaannartumik sunniuteqassanngilaq. Innuttaasulli tusagassiorfiit assigiinngisitaarnerulernerinik misigisaqarsinnaanerat itigartinneqarsinnaanani. Aammattaaq tusagassiorfiit amerlanerusut, tassunga ilanngullugu Sermitsiaq.AG, pappialanngorlugu saqqummertarunnaarnissaa itigartinneqarsinnaanngilaq, tamannalu assersuutigalugu tusagassiisarneq siunissami taamaallaat digitalikkut ingerlanneqalissappat innuttaasut tusagassiuutitigut ileqquinut sunniuteqarsinnaalluni.

7. Nunanut allanut tunngasunut sumiiffimmilu politikimut sunniutaasussat kiisalu sunniutaasussat allat

Inatsisissatut siunnersuut Kalaallit Nunaata nunanut allanut attaveqataanut nunanilu allani pisussaaffiitut sunniuteqarnaviannngilaq, tamatumalu saniatigut allanik sunniutissaqassanani.

8. Oqartussaasut kattuffiillu il.il. tusarniaavigineqarneri

Inatsisissatut siunnersuut piffissami 10. November 2025-miit 8. december 2025-mut tusarniutigineqarsimavoq. Tusarniaarneq pillugu inatsimmut nassuiaatit ilanngusaaq 2-mut innersuussisoqarpoq.

Siunnersuummi aalajangersakkat ataasiakkaat oqaaseqarfigineqarneri

§ 1-imut

Nr. 1-imut

Imm. 1-imi aalajangersagaq tassaavoq Inatsisartut inatsisaanni § 1, imm. 1-imik ingerlatitseqqinneq, "naqitat" peerneqarneri eqqaassanngikkaanni. Taamaalluni tapiissutit pillugit Inatsisartut inatsisaanni piumasaqaatinik naammassinnittut tusagassiorfiit tamarmik ilaalerput, alla pillugu immikkut aalajangersagaqanngippat, takuuk ilaatigut aalajangersakkami imm. 2. Ilanngullugu "tusagassiorfiit" "nutaarsiassanik tusagassiorfiit" allanngortinneqarpoq.

Aalajangersakkami imm. 2 Inatsisartut inatsisaanni § 2, imm. 2-mit ingerlateqqitaavoq ingerlatsinermullu tapiissutinik nassuiaataalluni.

Aalajangersakkami imm. 3 nutaajuvoq nutaarsiassanik tusagassiorfiit nassuiaataanik imaqlarluni. Aalajangersakkami "allat" nutaarsiassanik tusagassiorfiit tamarmik aamma aviisiullutik, aviisimut assingullutik saqqummersitaasarnerat, sulianut tunngasunik saqqummersitaallutik tusagassiuutilerisut digitaliusut aqqutigalugit, soorlu internet, oqarasuaat angallattagaq, tabletsit il.il. aqqutigalugit, kalaallinut atuartartunut siammartertarnissaat siunertaralugu ilanngunneqarpoq, tamatumalu saniatigut pappiaranngorlugit naqitat saqqummiunneqartartut.

Tassunga atatillugu oqaatigineqassaaq "apps" aalajangersakkami erseqqissumik taaneqarsimanngimmat, tassami apps taaguusersuutini "oqarasuaat angallattagaq"-mi aamma "tablet"-imi ilanngunneqarsimavoq. Taamatuttaaq oqaatigineqarsinnaavoq "digitalikkut isaasarfii" teknologiimut aalajangersimasumut killegartutut paasineqassanngilaq, tassa imaappoq app-it, assersuutigalugu taamaallaat smartwatchini imaluunniit smart-tv-ni taamaallaat atorsinnaasut taaguummi aamma ilaatinneqarput.

Imm. 4-mi aalajangersagaq nutaajuvoq radiukkut tv-kkullu aallakaatitsisarneq pillugu Inatsisartut inatsisaannut nr. 7, 8. juni 2014-imeersumut ilaasunut tusagassiornermik ingerlataqartunut siunnersuut malillugu tusagassiorfinnut tapiissuteqartoqarsinnaannginnera aalajangersarneqarluni. Tassungali atatillugu taaneqassaaq nutaarsiassaqaqtitsivik nutaarsiassaqaqtitsivimmi digitaaliusumi videomi qiortakkamut isissutissalerluni nutaarsiassamik saqqummersitsisimassappat tamanna tunngavigalugu radio tv-lu pillugit inatsimmut ilaalersutut isigineqalernavianngimmat. Isaasarfimmi nutaarsiassaq kisimi nassaasaanersoq aalajangiisuusaaq, matumani apeqqutaanani ilanngussaq videomi qiortakkamik ilaneqarsimassanersoq, tamannalu nutaarsiassami isissutissakkut pissarsiarineqarsinnaassanersoq.

Nr. 2-mut

Aalajangersagaq tassaavoq Inatsisartut inatsisaat malillugu tapiissutisisinnaasut tusagassiorfiit suunerinik tunngasoq Inatsisartut inatsisaanni atuuttumi § 2-p allanngortinneqarnera. Aalajangersakkamit takuneqarsinnaavoq tusagassiorfiit namminersortut arlaannaannulluunniillu atassuteqanngitsut pineqarnerinik piumasaqaat.

Aalajangersakkami imm. 1-imi "naqitat" peerneqarpoq, tak. pappialanngorlugu saqqummersinneqarnissaa pillugu piumasaqaat pillugu nassuiaatini nalinginnaasuni tamanna pillugu eqqaasaqarneq.

Aalajangersakkami imm. 2-mi pineqarpoq tusagassiorfik qanoq ilinerani namminersortutut isigineqartarnera pillugu apeqqummi, nr. 2-mi ilanngussisoqarpoq. Tassunga atatillugu "imaluunniit atuisunik nalunaarsuineq" ilanngunneqarpoq tusagassiuutilerisut digitaliusut assersuutigalugu toorsinerit assigisaasalunniit amerlassusii aallaavigalugit atuisut amerlassusaannik nalunaarsuisarnissaa pillugu naatsorsuutigisaq aallaavigalugu aalajangersakkami aamma tusagassiuutilerisut digitaliusut ilaatinneqalermata. Aalajangersakkami taamaalilluni tusagassiuutilerisup digitaliusup qanoq akulikitsigisumik alakkarneqartarneranik uppersaasarnissaa naatsorsuutigineqarpoq.

Nr. 3-mut

Aalajangersagaq Inatsisartut inatsisaanni § 16-imut tunngassuteqarpoq, tassanilu piumasaqaatit tigussaasut tusagassiorfinnut tapiissutinik tiguisartunut atuutsinneqartut taaneqarput.

Aalajangersakkami imm. 1, nr. 7-imi tusagassiorfiup pappialanngorlugu saqqummersinnissaanut tapiissutisinissamut siunissami piumasaqataajunnaarnissaa pillugu siunnersuummi pingaarnertut anguniakkamut naapertuuttumik "naqitaanissaa" peerneqarpoq.

Tamatuma saniatigut tusagassiorfiup saqqummersittagaasa qaammammut ikinnerpaamik ataasiarluni saqqummersittarnissaa aqutigalugu saqqummersitat akulikissusaat pillugu piumasaqaammi piumasaqartoqarpoq. Tusagassiorfinnut internetimik tunngaveqarlutik ingerlatsisunut tunngatillugu tusagassiorfiup nittartagaata nutartertarnissaanik ukiullu ingerlanerani ulluinnaat tamakkerlugit imarisanik nutaanik ilaneqartarnissaanik aalajangersagaq kinguneqartussaavoq. Tassani ima paasineqassaaq, ullormut nutarterisarnissat tassaatinneqarmata ataasinngornermit arfininngornermut ilaatinneqartut, nalliuttut eqqorneqanngippata.

§ 2-mut

Aalajangersagaq siunnersuutip ullormi 1. januar 2027 atuutilerfissaatut aalajangersaaffiuvoq. Atuutilersitsinissamut piffissaliunneqartoq inatsimmik allannguneq ukiup qaammatisiuteqarfiusup aallartinneraniit sunniuteqartalernissaanik kinguneqartussaavoq,

tamannalu aningaasaliissuteqartarnikkut allaffissornikkullu tunngaveqarluni tulluartutut
naliligaavoq.

Siunnersuut inatsimmut atuuttumut sanilliullugu	
<i>Oqaasertaliunneqartut atuuttut</i>	<i>Inatsisissatut siunnersuut</i>
	§ 1 Namminersorlutik Oqartussat nalunaarutaat nr. 63, 24. september 2025-meersoq naapertorlugu tusagassiorfinnut tapiissuteqartarneq pillugu Inatsisartut inatsisaanni makku allanngortinneqarpur:
§ 1. Naalakkersuisut aningaasanut inatsimmi aningaasaliissutit aalajangersarneqartut iluini tamannalu pillugu nuna tamakkerlugu tusagassiorfinnut naqitanut ukiumoortumik ingerlatsinermut tapiissutit aqqutigalugit tusagassiorfinnut tapiissuteqarsinnaapput, tassanilu paasissutissat inuiaqatigiinnut tunngassutillit, tamat oqartussaaqataaneranni oqallinnerit tusagassiortuunermilu tamatigoortuusoqarnissaanut ingerlatitseqqittarnerup siuarsaaffiginissaa siunertaavoq. <i>Imm. 2.</i> Ingerlatsinermut tapiissutit imatut paasineqassapput ingerlaavartumik ingerlatsinermi aningaasartuutitut, tassunga ilanngullugit sulisunut ininullu aningaasartuutitut, nalinginnaasumik aallakaatitassiornermut tapiissutit. .	1. § 1 ima oqaasertalerneqassaaq: "§ 1. Naalakkersuisut aningaasanut inatsimmi aningaasaliissutit aalajangersarneqartut iluini tamannalu pillugu nuna tamakkerlugu nutaarsiassanik tusagassiorfinnut ukiumoortumik ingerlatsinermut tapiissutit aqqutigalugit tusagassiorfinnut tapiissuteqarsinnaapput, tassanilu paasissutissat inuiaqatigiinnut tunngassutillit, tamat oqartussaaqataaneranni oqallinnerit tusagassiortuunermilu tamatigoortuusoqarnissaanut ingerlatitseqqittarnerup siuarsaaffiginissaa siunertaavoq. <i>Imm. 2.</i> Ingerlatsinermut tapiissutit imatut paasineqassapput ingerlaavartumik ingerlatsinermi aningaasartuutitut, tassunga ilanngullugit sulisunut ininullu aningaasartuutitut, nalinginnaasumik aallakaatitassiornermut tapiissutit. <i>Imm. 3.</i> Imm. 1 naapertorlugu nutaarsiassaqaqtitsivittut isigineqarpur aviiisit, saqqummersitat aamma sulinermut aviiisut nutaarsiassanullu assingusinnaasut, sulisunut saqqummersitat kiisalu nutaarsiassaqaqtitsiviit allat attaveqartarfiit digitaliusut, soorlu internet, oqarasuaat angallattagaq, tabletsit allallu, aqqutigalugit kalaallinut tusarnaartartunut ingerlateqqinneqartartut.

	<i>Imm. 4.</i> Tusagassiorfinnut tapiissutit Radiukkut tv-kkullu aallakaatitsisarneq pillugu Inatsisartut Inatsisaannut ilaasunut tusagassiorfinnut tapiissutigineqarneq ajorput."
§ 2. Tusagassiorfinnut namminersortunut, arlaannaannulluunniit attuumassuteqanngitsunut, naqitatigut nutaarsiassalerinermik massakkullu pisunut sammisalinnut tapiissutit tunniunneqartarput, matumani tamakku imarisaat kalaallinut atuartartunut aaqqissugaasimassappata imaluunniit nunani allani pisunut tunngatillugu kalaallinut tunngasunik isiginnissimassappata. <i>Imm. 2.</i> Tusagassiorfik namminersortutut isigineqassaaq: 1) namminerisaminik aaqqissuisutut pisortaqarpat, 2) namminerisaminik saqqummersitanik nalunaarsuisinnaappat, aamma 3) tusagassiuut immikkut pisartagaasinnaappat. <i>Imm. 3.</i> Tusagassiorfik arlaannaannulluunniit attuumassuteqanngitsutut isigineqassanngilaq: 1) Pisortani oqartussanit, suliffeqarfinnit imaluunniit ingerlatseqatigiiffinnit pisortanit aningaasalersorneqartunit assigisaannilluunniit tamakkiisumik ilaannakortumilluunniit pigineqarpat imaluunniit 2) tusagassiorfiup minnerpaamik affaa sulisitsisunit, sulisartunit, suliffeqarfinnit assigiimmik suliaqarfinnit soqutigisaqaqatigiinnilluunniit pigineqarpat, matumani ilanngullugit politikikkut partiit. <i>Imm. 4.</i> Tusagassiorfinni naqitani pineqarput aviisit, ullunut pisunut saqqummersitat saqqummersitaluunniit assingusut.	2. § 2 ima oqaasertalerneqassaaq: ” § 2. Nutaarsiassanik tusagassiorfinnut namminersortunut arlaannaannulluunniit atassuteqanngitsunut, imarisanik kalaallinut atuartartunut aaqqissuisartunut taamaallaat tapiissuteqartoqarsinnaavoq. <i>Imm. 2.</i> Nutaarsiassanik tusagassiorfittut namminersortutut isigineqassaaq: 1) namminerisaminik aaqqissuisutut pisortaqarpat, 2) namminerisaminik saqqummersitanik imaluunniit atuisunik nalunaarsuisinnaappat, aamma 3) tusagassiuut immikkut pisartagaasinnaappat. <i>Imm. 3.</i> Tusagassiorfik arlaannaannulluunniit attuumassuteqanngitsutut isigineqassanngilaq: 1) Pisortani oqartussanit, suliffeqarfinnit imaluunniit ingerlatseqatigiiffinnit pisortanit aningaasalersorneqartunit assigisaannilluunniit tamakkiisumik ilaannakortumilluunniit pigineqarpat imaluunniit 2) tusagassiorfiup minnerpaamik affaa sulisitsisunit, sulisartunit, inuussutissarsiortut soqutigisaqaqatigiilluunniit kattuffiannit pigineqarpat, matumani ilanngullugit politikikkut partiit."

7) tusagassiorfik minnerpaamik sapaatit akunneranut ataasiarluni nuna tamakkerlugu naqitanngorluni saqqummertassasoq,	3. § 16, imm. 1, nr. 7 imatut oqaasertalerneqassaaq: "7) tusagassiuut minnerpaamik qaammammut ataasiarluni nuna tamakkerlugu saqqummertassaaq, imaluunniit internetikkut tusagassiuut matumani pineqarsimappat ullut tamaasa nutarterneqartassalluni."
	§ 2 Inatsisartut inatsisaat ullormi 1. januar 2027 atuutilissaaq.

Tusarniaanermut allakkiaq

Inatsisissatut siunnersuut piffissami 13. april 2022-miit 11. maj 2022 tikillugu tusarniaaffigisassanut ukununga tusarniaassutigineqarpoq:

Sulisitsisut (GE)

SIK

Kommune Kujalleq

Kommuneqarfik Sermersooq

Qeqqata Kommunia

Avannaata Kommunia

Kommune Qeqertalik

Nuuk Internationale Friskole

NUSUKA

Ilisimatusarfik

TP Kalaallit Nunaanni Tusagassiorlut Peqatigiiffiat,

NTK

Sermitsiaq AG

KNR

Kalaallit Atuakkiortut Peqatigiiffiat

Iglo Magazin

Q-offset.

Tamatuma saniatigut siunnersuut Naalakkersuisut tusarniaanermut nittartagaat aqqutigalugu piffissami tassani pissarsiarineqarsinnaasimavoq.

Tassunga atatillugu tusarniaavigineqartunit ukuninnga akissutit tiguneqarput:

Sulisitsisut, Inuit Pisinnaatitaaffiit Siunnersuisoqatigiit Meeqqat Pisinnaatitaaffiit

Kattuffik MIO, Transparency International Greenland, Kommuneqarfik Sermersooq, Kalaallit

Nunaanni Tusagassiorlut Peqatigiiffiat (TP) aamma Dansk Journalistforbund peqatigalugit

tusarniaanermut akissutit nassiuusaqartut aammalu ataatsimoorlutik tusarniaanermut

akissuteqartut aamma Sermitsiaq/AG ilaapput.

Sulisitsisut § 1, imm. 3-mi " nutaarsiassanik tusagassiorfiit "-up taaneqarnera §-imi

aalajangersakkap paasinissanut nalorninernik pilersitsisinnaammat erseqqissaatigisimavaat,

matumani " nutaarsiassanik tusagassiorfiit " marloriarlugu taaneqarsimammat, naak

aappasaani qasseersiutinngorlugu taaneqaraluartoq. Tamatumani massakkut

oqaasertaliineqnutaarsiassanik tusagassiorfiit , tamannalu erseqqissumik taaneqarpoq,

attaveqartarfiit digitaliusut, soorlu internet, oqarasuaat angallattagaq, tabletsit allallu

aqqutigalugit, aqqutigalugit kalaallinut atuartartunut siammartertarnissaat pillugu

piumasaqaammik naammassinnissinnaannginnermik isumaqalersitsisinnaavoq.

Tamanna eqqarsaatigisassat tusarniaanermut akissutiniittut eqqarsaatigalugit siunnersuummut ilanngunneqarpoq.

Sulisitsisut § 2, imm. 3, nr. 1-imiittup "tamakkiisumik ilaannakortumilluunniit pigineqartoq"-p erseqqissarneqarnissaanut aamma apeqquteqarsimapput. Tassunga atatillugu matumani 10%, 50% imaluunniit 75% pineqarnersoq Sulisitsisut apeqquteqarput.

Tassunga tunngatillugu malugeqquneqarpoq matumani § 2, imm. 3, nr. 1-ip inatsisartut inatsisaanni atuuttumiittup allanngortinnagu ingerlateqqinneqarnera pineqarmat. Tassunga atatillugu kontumi pingaarnermi 2016-imeersumi aalajangersakkamut nassuiaatini takuneqarsinnaavoq killiliineq nr. 1-imi aalajangersaaffigineqartoq piginnittuunerup sananeqarnerani kikkunnut tamanut atuuttuusoq, soorlu toqqaannanngitsumik piginnittuunermi, tassani tusagassiorfik pisortani oqartussanit, suliffeqarfinnit imaluunniit ingerlatseqatigiiffinit assigisaannilluunniit pisortanit ilumoorpat tamakkiisumik ilaannakortumilluunniit aningaasalersorneqartunit pigineqarsimatillugu. Tamatuma saniatigut nassuiaatini takuneqarsinnaavoq ingerlatseqatigiiffik pisortanit aningaasalersorneqartutut isigineqarsinnaasoq ingerlatseqatigiiffik pisortat tapiissutaannik 50 procentinik amerlanerusunilluunniit tunineqarsimappat. Matumani pisortat suliffeqarfiutigigaat imaluunniit ingerlataasoq pisortanit aningaasalersugaasoq ammasumik takuneqarsinnaatillugu aningaasalersuisoqarnissaanut atugassarititat immikkut ittut isiginiarneqarsinnaapput.

Kiisalu Sulisitsisut siunnersuummi nr. 3-mi allannguummut isumaqataanertik erseqqissaatigaat, tamatumalu kingorna § 16, imm. 1, nr. 3-mi ukiumut suliffiusussat pingasut ukiumut suliffiusussanut marlunnut ikilisinneqassallutik.

Nassuiaatini nalinginnaasuni oqaatigineqartutut aalajangersagaq Sermitsiaq.ag-p akissutaanut uiggiullugu allanngortinneqarpoq. Tamanna pivoq tusagassiutinut namminersortunut tapiissutit pingaarnertut tunniunneqartarnissaat siunertaralugu, tusagassisarnermik pitsaasumik pimoorussisumillu ingerlatsinerat piumasaqaatigalugu.

Sulisitsisut tassunga atatillugu erseqqissarpaat piumasaqaatit tamakku suliffeqarfiup tapiiffigineqarnissaminut periarfissaanut "aalajangiisuullutik" sunniuteqartitsinngikkaluarlutik tusagassiorfimmi aqqissugaasumut arlaatigut piumasaqartoqarmat soorunami paasinnissinnaalluarlutik.

Inuit Pisinnaatitaaffiit Siunnersuisoqatigiit aamma MIO tusarniaanermut ataatsimut akissuteqarnerminni Naalagaaffiit Peqatigiit Meeqqat Pisinnaatitaaffii pillugit Isumaqaatigiissutaanni artikel 17-imi imaritinneqartunik taasaaqqissimapput. Ukiumut suliffiusartut marlunnuk ikilineqarnissaat aamma sullissisartut ilisimasallit

sulisorineqartarnissaat pillugu piumasaqaat matumani pineqartartussaasoq pillugit siunnersuut aamma tapersersorneqarpoq.

Tassunga atatillugu GE-p taanna pillugu oqaaseqaataa innersuunneqarpoq.

Transparency International Greenland (TIG) erseqqissaavoq nuna tamakkerlugu nutaarsiassaqaartitsivinnut ukiumoortumik ingerlatsinermut tapiissutit atorlugit tusagassiorfinnut tapiissuteqarsinnaanissamut inatsisitigut sulit tunngavissaqaartuartaammat ajunngitsumik isigalugu, taakkunanilu paasissutissat inuiaqatigiinnut tunngasut ingerlateqqittarnissaasa, tamat oqallinnerisa tusagassiortuunermilu tamatigoortuusoqarnissaata siuarsaaffigineqarnissaat siunertaavoq. TIG aamma Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoqarfik tassunga peqatigitillugu isumaqarput tusagassiorfiit arlaannaanulluunniit atassuteqanngitsut tamat oqartussaaqataanerannut tunngaviulluinnartuusut aamma inunnut paasissutissiisarnerit oqaloqatigiinnernik ilaneqartut tamat oqartussaaqataanerannut nukittorsaaqataasut isumaqarlutik.

Naalakkersuisut erseqqissaatigineqartunut isumaqataaginnarsinnaapput.

TIG tamatuma saniatigut tusagassiorfinnut tapiissuteqarnermi tusagassiuutilersisut digitaliusut aamma ilaasariaqartut isumaqataaffigaat.

Ilanngullugu TIG-mit oqaatigineqarpoq massakkut aningaasanut inatsimmi aningaasaliissutaasut ikippallaalaartut, aningaasanullu inatsimmi 2026-moortumi 1,9 mio. kr.-it innersuullugit. TIG tamanna nangillugu kaammattuivoq, naak aviisinik naqitanik saqqummersitsinninnikkut naatsorsuutigisamik sipaartoqarsinnaagaluartoq, aningaasanut inatsisissatut siunnersuummi takkuttussami tusagassiorfinnut tapiissutini aningaasanik malunnaatilinnik immikkoortitsisoqassasoq, tassalu siunnersuummi qarasaasiakkut anguniagassat naammassineqartussatut kissaataappata.

Tassunga atatillugu malugeqquneqarpoq siunnersuummi aningaasaliissutit qanoq amerlatiginissaannik malittariassiortoqanngimmat, taakkualu aningaasanut inatsimmi suliassaaquartussaapput Inatsisartut piginnaatitsissutaannut ilaallutik.

TIG tamatuma saniatigut tusagassiorfinnut tapiissutit agguaattarnerannut kinaassusersiornani suleriaatsimut § 2-mut nassuiaatini erseqqissumik taaneqartunut tapersersuipput, tassungali peqatigitillugu tunniussisarnermi tamakkiisumik takunnissinnaanerup qulakkeernissaa kaammattuutigalugu. TIG tassunga atatillugu qinnuteqaatit tunniussinerillu tamaasa, piumasaqaatit qanoq ilillugit naammassineqarsimasutut nalilerneqarsimanersut aammalu aalajangiinissami tunngaviliunneqartumi paasisaqarnissamut periarfissaqaartitsineq pillugit immikkut apeqqutigineqartumik taasaqarput.

Tassunga atatillugu tapiissuteqartoqarnissaa pillugu qinnuteqaatit tunniussisarnerillu, taakkununga ilanngullugit aningaasat amerlassusaannut kisitsinerit pisariaqarsimappallu tunngavilersuinerit, tamanit tamakkiisumik takuneqarsinnaanngortinneqarsimammata malugeqquneqarpoq, takuuk Ingerlatsivimmi tamat takunnissinnaanerit pillugu Inatsisartut inatsisaat nr. 9, 13. juni 1995-imeersoq kingullermik Inatsisartut inatsisaatigut nr. 6, 31. maj 2001-imeersutigut allanngortinneqartoq.

Kommuneqarfik Sermersuup tusarniaanermut akissummini oqaatigaa nutaarsiassaqaqtitsiviit naqitat atorlugit nutaarsiassaqaqtitsiviit digitaliusut naligiissillugit nutarsaaniarneq ineriartornermut kulturimut sunngiffeqarnermilu annertuumik saqqumisitsinikkut sammititamut malinnaasutut nalilerneqartoq. Ukiunut suliffiusussanut annikinnerulersitsinissamik siunnersuutaasoq namminersortutut ingerlatsisut tusagassiorfeqarfinnut akuulersinnaanissaminut periarfissagissaarnerulernissaannik malitseqarsinnaasoq ilanngullugu erseqqissaatigineqarpoq. Tamanna nangillugu maluginiarneqarpoq nutaarsiassaqaqtitsiviit digitaliusut annertusineqarnerat kulturimik sulialinnut mikinerusunut, inuusuttunut suliniutinut allatullu nunap immikkoortuini ingerlatitseqqittartunut periarfissanik nutaanik pilersitsisinnaassasoq. Kommuneqarfik Sermersooq tamatuma saniatigut erseqqissaavoq Kommuneqarfik Sermersuumi sulinermi kulturi inuusuttullu pillugit sulinerup iluini suliniutissat digitaliusut mikinerusut nassaassaasut. Ingerlatallit tamakku piumasaqaatinik siunnersuutigineqartunik eqqortitsisinnaassappata tusagassiorfittut tapiissutinut periarfissaqarneruleriaannaapput. Ilanngullugu erseqqissarneqarpoq kommuni ingerlatsisunik immikkuullarissunik eqqarsaatinut ilanngussaqaqsimanatik, taakkuami tusagassiorfinnut tapiissutinik qinnuteqarnissat naatsorsuutaavoq, kisianni taamaalinerani inatsisissatut siunnersuutip atortussanngortinnerani immikkoortillugit peqataatinneqarumaarlutik.

Tusagassiorfittut Peqatigiiffiat (TP) aamma Dansk Journalistforbund (DJ) peqatigiiffiit ataatsimoortumik tusarniaanermut akissutaanni aallarniutigalugu erseqqissarsimavaat Kalaallit Nunaanni tusagassiorfiit kiffaanngissusillit aamma arlaannaannulluunniit attuumassuteqanngitsut qulakkeernissat siunertaralugu tusagassiorfinnut tapiissutit nutarterneqarnissat pillugu naalakkersuisooqatigiit isumaqatigiissutaanni oqaasertaliunneqartumut isumaqataasinnaallutik. Tamannalu nangillugu erseqqissarneqarpoq 2022-mi allannguutit atorlugit nutarsaasoqarnissanut siullermik alloriartoqarsimasoq, siullertullu maanna alloriartoqarmat tamanna ajunngitsumik nalilerlugu.

TP aamma DJ tassunga peqatigitillugu tusagassiorfiit tusagassiorfinnillu ineriartorneq pillugit isumasioqatigiissitsinissamut peqataasinnaanertik ilanngussisinnaanertillu uppersarparaat, isumasioqatigiissitsinerlu ukioq kingulleq septembarip aallartinnerani ingerlanneqarsimavoq. Siunnersuummi nassiunneqartumi siunnersuutinut isumasioqatigiissitsinermi oqallisigineqartunut tusaaniartoqarsimaneranut tamanna takutitsisusoq peqatigiiffiit ilanngullugu oqaatigivaat.

TP aamma DJ ilanngullugu malugeqqaat siunnersuummi aallarniutigalugu oqaasertaliunneqartunut tapersersuillutik, tassalu tusagassiorfiit kiffaanngissusillit aamma arlaannaannulluunniit attuumassuteqanngitsut tamat oqartussaaqataaneranni tunngaviulluinnartuusut, taamaammallu tusagassiorfiit tusagassioruunerlu pillugit tapersersuisoqartarnissaa illersuisoqartarnissaalu pingaaruteqartuullutik. Tamanna nangillugu TP aamma DJ tusagassiorunik ilinniarnikunik amerlanernik pisariaqartitsisoqarneranut innersuussipput, tassungalu peqatigitillugu tusagassiorut pillugit inatsimmik nutarsaasoqaannarnani kisiannili aamma aningaasanik atorineqartussanik amerlanernik nassaarnissaq politikernut kaammattuutiginiarlugu. TP aamma DJ tassunga peqatigitillugu isumaqataapput tusagassiuutilerisut digitaliusut tapiissuteqartarnermut periarfissanut ilaasariaqartut, kisiannili matumani piumasaqaataassalluni tusagassiorfinnut tapiissutitut aningaasaliissutaasartut ilaneqartariaqartut, tassami tamanna pissagaluarpas tusagassiorfinnut tapiissutit qinnuteqartunut amerlanernut agguanneqartariaqassammata.

Tassunga atatillugu TIG-p tusarniaanermut akissutaani oqaatigineqartunut innersuussisoqassaaq, tassalu siunnersuut aningaasaliissutit amerlassusissaannut malittarisassiorfiunngimmat, tamannalu aningaasanut inatsimmut tunngasuujuartussaammat Inatsisartut piginnaatitsissutaasa ataaniilluni. Tusagassiorunik amigaaqartarnermut tunngatillugu ajornartorsiutinngortoq tusagassiorutut tapiissuteqartarneq pillugu inatsit aqqutigalugu sumiissusersineqarsinnaanngilluinnartoq matumani pineqarpoq, kisiannili tamanna ilinniarnernit qaffasissusiisa ataatsikkoortinneri, pitsaanerusumik sulisussarsiorarnermut periusissiat aamma massakut tusagassiorfinni sulinermi atugassarititaasut qitiutinneqartut aqqutigalugit ikiorsiiffigineqarsinnaassalluni. Matumani tusagassiorutunngorniarnernup Kalaallit Nunaanni pissutsinut naleqqussagaasup nukittorsarnissaa aallartinneqareersoq pineqarpoq, soorlu kalaallit oqaasiinik atuinnikkut, ilinniaqqinnissanut attuumassutilinnut periarfissaqarnikkut aamma tusagassioruunerup pingaaruteqassusaanut inuiaqatigiit tungaasigut nalinginnaasumik akuersinikkut.

TP aamma DJ tamatuma saniatigut isornartorsiorpaat siunnersuummi pitsaasumik taasassat pigineqaraluartut tusagassiorfinnut tapiissutitut aningaasaqarnikkut killiliussaq ukiumoortumik aningaasanut inatsit pillugu isumaqatigiinniarnernut atatillugu aalajangersarneqartuurtussaammat, tassungalu atatillugu aningaasaqarnermut killiliussat pillugit tusagassiorfiit pillugit ukiunut arlalinut atuuttussamik isumaqatigiissusiortoqarnissaa kaammattuutigalugu. Tamatuma saniatigut Kalaallit Nunaanni tusagassiorut amerlanernit ilinniartinnissaasa pingaarnersiuffiginissaannut aningaasalersuiffiginissaannullu pilersaarutit piffissamut sivisunerusumut atuuttussat pilersaarusiortfigisariaqarput.

Tassunga atatillugu malugeqquneqarpoq isumaqatigiissutaasut ukiunut arlalinut atuuttussat piviusunngortinnerat aamma ukiumoortumik aningaasaliissutitut inatsisini aallaaveqartassasoq, tassanilu aningaasaqarnikkut periarfissaqarnissap piviusunngortinnissaa piumasarineqarpoq, tamannalu isumaqatigiissummut ilaasut pingaarnersiuffiginissaassavaat. Isumaqatigiissutaasut taamaattut taamaasillutik

aningsaanut inatsimmi killiliussanik aalajangersaasoqarsimaneranik tunngaveqarput, tamannalu aqqutigalugu killiliussat iluanni pingaarnersuinissat periarfissaalerput, tamannalu aningsaanut inatsiseqarfiusumut 2026-mut tunngatillugu iluatsissimannngilaq. Matumani apeqqut Naalakkersuisut immikkut maluginiagaat pineqarpoq, taamaammallu isumaqatigiissutissat ukiunut arlalinnut atuuttussat piviusunngortinnissaannut tunngatillugu periarfissaqarneq pisariaqartinneqartoq atorsinnaalerniarlugu periarfissanik misissuineq ingerlajuarpoq.

TP aamma DJ tamatuma saniatigut § 2-mi allannguutitut isumaqataapput, taamaasilluni tusagassiorfinnut tapiissutitut aningaasaliissuteqarnermi tusagassiorfik pappiaqqat atorlugit saqqummersitsisarnersoq apeqqutaasussaassanngilaq. Tamatuma saniatigut TP aamma DJ § 1-imi erseqqissaataasunut taaguutigineqartunullu tunngatillugu allannguutitut aamma isumaqataasinnaapput. Taamaakkaluartoq TP aamma DG aperipput tusagassiummi digitaliusumi nutaarsiassaqaqtitsivik qanoq isillugu pineqassanersoq, tassani aamma podcasts imaluunniit videomik qiortakkat ilaatinneqartillugit. TP aamma DJ isumaat malillugit nutaarsiassaqaqtitsiviit tusagassiorfinnut tapiissutitut tunineqarnissaminut pisinnaatitaaffeqartariaqartut, tassalu saqqummersitami nipinik assilissanillu tunisassiorneq ilaasimassappat.

Tassunga atatillugu malugeqquneqarpoq nutaarsiassaqaqtitsiviit tusagassiuutilersisoq digitaliusoq atorlugu nutaarsiassamik videomi assilisamut isissutissalerlugu saqqummersitsisimappata tamanna tunngavigalugu siunnersuummut paarlaallugu radio tv-lu pillugit inatsimmut ilaalersutut isigineqarsinnaassanngimmata. Tamanna aamma § 1, imm. 4-mut tunngatillugu siunnersuummi nr. 1-imut nassuiaatini erseqqissaaffigineqarpoq.

Tamatuma saniatigut oqaasertaliunneqartup "kalaallit tungaanit isigalugu" § 2, imm. 1-imi nassuiaatini tunngavilersuutit erseqqissaatigineqartut atorlugit atorunnaarsinneqarsimaneranut TP aamma DJ isumaqataapput.

Siunnersuummi ukiumut suliffiusartut ikilisaaffiginissaannut tunngatillugu TP aamma DJ erseqqissaapput matumani Inatsisartut inatsisaannut atuuttumut tunngatillugu ajorseriarneq pineqartoq, tassami tusagassiorfinnut tapiissutit pisortanit aningaasalersorneqartunut tusagassiorfittut suliffinnut arlaatigut aqqissuisoqarfimmi nukissalinnut immikkullu ilisimasalinnut taamaallaat tunniunneqarsinnaassammata. Tassungali atatillugu TP aamma DJ erseqqissaapput ukiumut suliffiusussanut pingasunut paarlaallugu ukiunut suliffiusussat ukiunut marlunnut ikilisinneqarsimammata isumaqataallutik, tassami tusagassiorfinni aqqissuisut amerlanerit tusagassiorfinnut tapiissutitut tunineqarnissaminut periarfissaqarnerulernissaannut kissaammut allannguneq tunngavilersorluagaammat.

GE-mit tusarniaanermut akissutaanut tunngatillugu oqaatigineqartutut aalajangersakkakut qulakkeerniarneqarpoq tusagassiuutitut tapiissutit tusagassiuutitut pimoorussisunut

aaqqissuisoqarnikkut inissisimalluartunut tunniunneqartarput, soorlu TP-mit DJ-millu taama oqaasertalerneqartoq.

Aalajangiisartunik ataatsimiititalianillu arlaannaannulluunniit attuumassuteqanngitsunik pilersitsisoqarnissaanut TP aamma DJ aamma siunnersuuteqarput, taakkualu Kalaallit Nunaanni tusagassiorfinnut tapiissutinik suliaqartassapput, aningaasallu tunniunneqartut atortarnissaannut nakkutilliisuussallutik.

Tassunga atatillugu erseqqissarneqassaaq ingerlatsinermut tapiissutit aqqutigalugit tusagassiorfinnut tapiissutit tunniuttarnerannut malittarisassat tusagassiorfinnut tapiissutit aqunneqarnissaannut allaffissornikkut suliffiup nutaap allattoqarnikkut ikiortillip pilersinnissaanut tunngavilersuutaasinnaangimmata, tamakkumi ukiorpassuarni taamaallaat ingerlatsinermut tapiissutitut tunniunneqartarsimapput. Naalakkersuinikkut aalajangiisartut apeqqutaatinngit atortup pilersinnissaa siullertut ingerlatsinerup sularineranut atatillugu piumasaqaatit tunngavilersugaanngitsut ilanngunnissaat pinngitsoortinniarlugit eqqarsaataasoq tunngavilersorneqarpoq. Ingerlatsinermut tapiissutit kinaassusersiornani tunngavik paasineqartoq atorlugu tunniunneqartarput, tassanilu piginnaatitsissutit sakkortusisat ilaatinneqanngillat, taamaattoqarmallu malittarisassat kinaassusersiorluni nalilersuinerit ilanngunnissaannut periarfissaqartitsinermik kinguneqartussaananik.

Taamaakkaluartoq inatsiseqartitsinermi piffissami 15. oktober 2015 Tusagassiorfinnut tapiissuteqartarneq pillugu Inatsisartut inatsisaata allanngortinneqarnera pillugu Inatsisartut inatsisaata nr. 14, 20. november 2016-imeersup atuutilernissaa tikillugu tunniussisarnermut ataatsimiititaliaq allattoqarfimmi ikiortaasut ilanngullugit sullissisartuusimavoq (Suliniutinut tapiissuteqartarneq pillugu malittarisassat atorunnaarnerat), taannalu ullormi 1. januar 2023 atuutilerpoq. Tamatumunnga pissutaanerpaajuvoq tusagassiorfinnut tapiissutaasartut piffissami tassani taaneqartumi ullumikkutuulli nalinginnaasumik ingerlatsinermut tapiissutitut tunniunnagit suliniutissanut tigussaasunut tunniunneqartarsimammata. Taamaammat tusagassiorfinnut tapiissutit massakkut atorneqartut allaffissornikkut immikkoortortamik immikkut pilersitsinissamut pisariaqartitsiffiunngillat.

Tusagassiorfiup Sermitsiaq.ag-p tusarniaanermut akissummini aallarniutigalugu erseqqissarpaa siunnersuummut pingaarnertigut isumaqataalluni, akueralugulu pingaarnermik digitalinut nuunnissanut tunngatillugu Kalaallit Nunaanni tusagassiorfinnut killiliussat nukittunerulernissaannut assut pisariaqartitsisoqartoq, tamannami nunanut sanilerisatsinnut sanilliullugu malunnartumik kinguaattoorfiulereersimavoq.

Tassunga atatillugu taaneqassaaq tamanna pingaarnertut pissutaasunut ilaammat pappiaqqat atorlugit saqqummersitsisarnissamut piumasaqaatip atorunnaarsinnissaanut siunnersuuteqartoqarsimammata.

Taamaattorli Sermitsiaq.ag tusarniaanermut peqataasut allat, soorlu Sulisitsisut, TIG, Kommuneqarfik Sermersooq, Inuit Pisinnaatitaaffiit Siunnersuisoqatigiit MIO kiisalu TP aamma DJ, akerrallugit isumaqarpoq siunnersuut tapiissutinik tunineqarsinnaassagaanni minnerpaamik ukiumut suliffiusussanut pingasunut piumasaqaatip sakkukinnerulernissaa anguniartariaqarmat. Sermitsiaq.ag taamaasilluni erseqqissaavoq taamatut sakkukillisaasoqarnissanut isumaqataasinnaani. Malittarisassanik iluarsisoqarsimasuuppat aaqqissuisuunikkut ukiumut suliffiusartut ikilisaaffiginagit sakkortusisariaqartut tusagassiorfik akerrallanik isumaqarpoq.

Oqaaseqaat ima ilanngunneqarpoq, maanna ukiumut naammassisinnaasat attatiinnarneqarput tusagassiorfimmi aaqqissuinermini avatangiisit naammaginartut attannissaat qulakkeerniarlugu. Allannguut taamaasilluni illuatungaani sullissisartut ilisimasallit nutaarsiassanik pimoorussilluni ingerlateqqitassanik pitsaassuseqarlutik, kinaassusersiornatik nutaarsiassanillu suliarilluakkanik atuillutik ilanngussisinnaasut, illuatungaani tusagassiorfiit amerlanerit tapiiffigineqarnissamut periarfissaqalernissaannut tunngaviatigut ammaassinissaq pillugit oqimaatigitiittoqarnissanut oqariartuutaavoq. Tusagassiorfinnut tapiissutit taamaallutik tusagassiorfinnut tapiissutaajuartussaassapput, tassunga ilanngullugit nutaarsiassaqaartitsiviit minnerpaamik aaqqissuisoqarnikkut piginnaasaqartut, kinaassusersiunngitsumik piviusunillu tunngaveqartumik politikikkut, inuiaqatigiinnut attuumassuteqartunik kulturimillu sammisaqartunik suliaqarsinnaasut.

Tamatuma saniatigut Sermitsiaq.ag siunnersuummi nr. 4-mi qaammammut saqqummersitsisarnissamut piumasaqaat ullut tamaasa saqqummersitsisarnissaq pillugu piumasaqaammut allannqortariaqartoq taavaat. Tamanna tusagassiorfinnut tapiissutit inuiaqatigiinni massakkut ingerlaavartumillu pisunut tusagassisartunut sammitinneqartariaqarnerannut tunngavilersuutaavoq, tamannalu innuttaasut nutaarsiassanik atuinerannut aalajangersimasumik ilaavoq.

Nassuiaatigineqartoq siunnersuummi nr. 3-mi allannqortitsinernik malitseqarsimavoq, tassalu tusagassiorfiit internetimik tunngavillit pineqarsimatillugit tusagassiorfiup nittartagaa ullut tamakkiallugit nutartertarnissaa pineqarsimatillugu tamanna § 16, imm. 1, nr. 7-imi massakkut takuneqarsinnaalersillugu.

Ilanngullugu Sermitsiaq.ag piumasaqaammik nassaassaqaartariaqarneranut erseqqissaateqarput, tassalu nutaarsiassaqaartitsiviit tapiiffigineqarsinnaasut sammisanik inuiaqatigiinnut soqutiginaatilinnik amerlasuunik tusagassisinnaasariaqartut, tassungalu immikkut tunngatillugu politiki inuiaqatigiillu, kulturi, timersorneq, ilinniartitaaneq ilisimatusarnerlu, inuussutissarsiutit aningaasaqarnerlu ilaasariaqarput. Sermitsiaq.ag erseqqissaavoq tusagassiorfinnut tapiissutini tusagassiorfiit soorpiannngitsunik soqutigisallit kisimik tapersersuiffigisariaqanngitsut, annertunerusutigulli tusagassiorfiit inuiaqatigiinnik amerlasuutigut suliallit piuinnaassaat qulakkeerlugu, tamakkulu inuiaqatigiinni

eqimattakkaat soqutigisallillu akimorlugit tamat oqartussaaqataanerisigut oqallinnernut tapeeqataasussaapput.

Tassunga atillugu oqaatigineqassaaq piumasaqaat taanna naammassineqareersimasutut isigisariaqarmat, tassami § 1, imm. 1-ip oqaasertalerneqarnerani Inatsisartut inatsisaanni atuuttumi § 1, imm. 1-imi aamma siunnersuummi nr. 1-imi takuneqarsinnaavoq tusagassiorfinni tapiiffigineqarsinnaasuni nuna tamakkerlugu nutaarsiassaqaartitsiviit pineqarmata, taakkualu paasissutissat inuiaqatigiinnut tunngassutillit ingerlateqqittarnissaasa, tamat oqallinnerisa tusagassiortuunermilu tamatigoortuusoqarnissaata siuarsaaffiginissaannik siunertaqarput.

Tusagassiorfinnut tapiissutitut aningaasaliissutissatut siunnersuutaasoq immini unammilligassanut Kalaallit Nunaanni tusagassiorfiit naapitassaannut tunngatillugu annikippallaartoq tamatuma saniatigut Sermitsiaq.ag-mit erseqqissarneqarpoq. Sermitsiaq.ag tassunga atillugu sulisussanik piukkunnaatilinnik amigaateqarneq, sulisussarsiorternut unammilligassat annertuut, tunisassiornermut aningaasartuutit amerliartortut, ileqquusumik isaasarfinniit isertitat ikiliartortut aammalu nunani allani sullissisunit unammillerneq annertusiartortoq taavaat.

Tassunga atillugu oqaatigineqassaaq tusagassiorfinnut tapiissutitut aningaasaliissutissat siunnersuutigineqanngimmata. TIG, TP aamma DJ-p tusarniaanermut akissuteqarnerannit takuneqarsinnaasutut siunnersuutikkut tapiissutit annertussusaat aalajangersarneqassanngillat, tamannalu aningaasanut inatsisikkut sulii aaqqinneqartassaaq, tamannalu Inatsisartut oqartussaafigivaat.

Ilanngullugu tusagassiorfiit pillugit ataatsimiititaliaq arlaannaannulluunniit attuumassuteqanngitsoq imminullu ikiortoq tusagassiorfinnut tapiissutit tunniuttarnissaannut akisussaasoq aqutugalugu allaffissornikkut immikkoortumik nutaamik pilersitsisoqassasoq Sermitsiaq.ag-mit kaammattuutigineqarpoq. Ataatsimiititaliaq taamaattoq aalajangiisarnermut tunngavimmik ersarissumik tatigineqarsinnaasumillu tusagassiorfinnut tapiissutit tusagassiorfinni sulinikkut tunngaveqarluni tunniuttarnissaannut piumasaqaatit ersarissut takuneqarsinnaasullu aammalu kinaassusersiunngitsut atorlugit eqqussisoqarnissaanik qulakkeerinnissaaq.

Soorlu tamannarpiaq pillugu TP-p aamma DJ-p oqaaseqaataasa oqaaseqarfiginerannut atillugu erseqqissarneqartoq ingerlatsinermut tapiissutit aqutigalugit tusagassiorfinnut tapiissutit tunniuttarnerannut malittarisassat allaffissornikkut immikkoortup nutaap pilersinnissaanut tunngaviusinnaanngillat, tassanilu allattoqarnikkut ikiorteqarneq il.il. tusagassiorfinnut tapiissutit aquneqarnissaannut atuuttussaq pineqarpoq, tamannalu ukiorpassuarni taamaallaat ingerlatsinermut tapiissutitut tunniunneqartarsimavoq.